

李氏續焚書

李氏續焚書卷之二

序彙

○○開國小敘

臣李贊曰我

太祖高皇帝蓋千萬古之一帝也。古唯湯武庶幾近之。然武末受命，非周公則無以安殷之患。臣湯之受命也，晚非伊尹則不克克于大甲之顛覆。唯我

聖祖起自濛荒，以及即位，前後幾五十年，無一日而

不念小民之依無一靖而不思得賢之輔蓋自其託

身皇覺寺之日已慨然于食官汙吏之虐民欲得而甘心之矣故時時用其時時禁論諸將無一字而非惻怛亦無一字而不出于忠誠故天下士咸願歸而附之而樂爲之死也予是以首錄開國諸臣而先之曰開國諸臣總敘者此也蓋敘而總之正以見死事之衆皆千古之所未曾有此必有大根本存焉非可以人力強而致也故又曰開國諸臣

本根知必有本根則知當時死事者之所以衆矣而緣起于濠城一劍之提伽藍神前一琰之下而已嗚呼兵力單弱子興非夫恥乎小哉何所復望於入建業滅江州擒士譙混一江南而平定山東河南北也夫以其所緣起者寡弱如此而所成就者神速至大如彼故又曰開國諸臣緣起焉嗚呼合是三者而觀之而後知我

太祖高皇帝所以聚天下之由矣況自是而後建文繼之純用恩而

成祖二十有二年則又恩威並著而不謬

仁宗繼之純用仁而

宣宗章皇帝在位十年則又仁義並用而不失況正

統十年之前

昭聖未賓三楊猶在尚行

二祖三宗之政乎則我

朝仁義立國愛民好賢蓋相繼且百有餘歲也自古

開創之君曷嘗有此哉臣是以伏讀而詳著之以

見今者

聖子神孫所以安享太平之故當知無匹  
祖宗功德于無窮也

○○○史閣敘述

夫子曰爲君難爲臣不易此雖一時告定公語而  
千萬世君道臣道不越是矣君之難難于得臣臣  
之難難于得君故夫子他日曰爲天下得人難此  
言君之所以難也又曰獲于上有道此言臣之所  
以難也君知其難則自能旁搜博採若我  
太祖高皇帝然唯務得人而後已臣知獲上之不易

則自然其難計。慎若我中山徐武寧公，委曲承順以求合我識主之初心，則難者不難，不易者自易。此必至之理。而公之實非若世之務爲容說以賊害其君者之比也哉。

國家不設丞相，蓋實應待臣之難耳。是故汪胡誅夷，善長亦死。然而臣哉鄰哉，鄰哉臣哉，手足股肱，相待成體，無一時可少者，是以

文皇帝復設內閣，而解大紳首當內閣之選焉。解之天才，非但一時傑出，卽先後閣臣亦當推讓之矣。

所謂以

至聖之主獲至賢之佐其不易爲何如者而成老若  
善長死才若解大紳亦死然則吾夫子爲君難爲  
臣不易之語遂成眞難而眞不易邪豔之上九曰  
不事王侯高尚其事夫上九居艮止之地處艮山  
之高當外卦之上正王侯之有事者乃不事王侯  
之事而以高尚爲事焉是止也而下之人又舉巽  
寬裕以成之致豔矣疑哉若我

二祖乃萬世大有作爲之君不肯苟止于上二臣又



萬世不誥之臣不肯卑異于下固安其若合符契若簫韶奏而鳳凰鳴也笑謂而卒不相入也蓋觀于蠱上九之象曰不事王侯志可則也夫不事王侯之事而以高尚爲事是蠱也爲子者反謂其志可則而切切焉用譽以巽入之故夫子又於六五之象復提掇而申明之曰幹父用譽承以德也夫爲人子者既能用譽以承父之德則父子之情大通無間因而照舊幹理使百執事各司其事先甲後甲符合天行而家事治矣爲父者喜其子之以

我爲有德也自然與子同心而無阻隔不通之情  
爲子者樂其父之能自優游舒泰也自然於父情  
意相通而又安有蠱壞不治之事正所謂有子考  
无咎者也何必以不事事爲父過邪若必以不事  
事爲父過則人亦何貴於有子若以不事王侯之  
事爲父德則又何患乎父子之不通蠱事之不治  
故曰蠱元亨而天下治也元亨者大通也利涉者  
有事也有事則治而不蠱矣夫上不事事子猶以  
爲德而將順之況勤于有事若我

太祖皇帝之爲君。可日夜求過進。無益之庖。西萬言。以事抵觸。若解大紳等邪。吾以爲當此之時。正所謂五帝神聖。其臣莫及。不可不知。自揣者。從容其間。以需顧問。縱有所陳。直推尊而表揚之。曰。是唯我后之德焉。更不必索忠諫之矣。名而欲以憂危其主也。何也。履虎尾者。必使不至於啞人。而後亨。而世實未有履虎而不啞者。或者大紳亦未之思。而遽易焉。以履其後乎。此實苛尚書大易之訓。雖死何辭也。縉于。

高皇僅免一啜至

文皇終不得脫矣。夫大紳文學之選也。所謂多讀書識義理之人也。乃易與尚書反束而不讀。何邪。非不讀也。讀之而不知其義也。所謂不識字之人是也。夫以千載不易得之君臣。一旦得之。又以不識字之故。反失之不誠。可慨邪。二百餘年。若劉忠宣之事泰陵。李文正之當正德。可稱不易之臣矣。若楊新都者。雖能委曲于彬。忠用事之朝。而不能致身以事達禮之主。天資近道。而不知學。是最爲可

憐之人夫學何學也學然後知爲臣之不易也故  
曰人不學不知道常人儉不可不學不學則不知  
道而況于事君之道而又況于內閣史臣之道之  
猶不易者邪是故謹備述之

○○壽隼太史尊翁後渠公八袞華誕序

李宏甫曰予至京師卽聞白下有隼弱侯其人矣又  
三年始識侯旣而徙官留都始與侯朝夕促膝窮詣  
彼此實際夫不詣則已詣則必爾乃爲冥契也故宏  
甫之學雖無所授其得之弱侯者亦甚有力夫侯下

吾人也。世之顯又姦者，毀矣。其爲又事，故以立。言。師侯侯爲制科，以資進取，顯功名，不世之。一則師侯侯又其大者，則曰是。暇。飲水以善事其親者，也是立德也。故世之爲不哲，故以交于侯者，非一宏甫也。然惟宏甫爲深知侯，故弱侯亦日以宏甫爲知己。萬曆十年春，是爲侯家大人後渠六十之誕。先是九年冬，侯以書來曰：「通歲當走千里，與宏甫爲十日之飲，已而果然。飲十日而別，別至中途，復以書來曰：『家大人三歲失怙，特備嘗艱辛，能自立，不至墮穉。十六襲。」

祖廕掌軍政四十年爲人伉直不以一言欺人亦不  
疑人欺之心事如直繩可一引而盡蓋平生無違心  
之言與違心之行者自茲所見惟家大人一人耳中  
年始舉伯兄專意督教務欲有成至茲爲兒敘事一  
付伯兄曰家有讀書種子當不斷絕矣及伯兄爲令  
所入俸盡廢之官嫺黨或謂家大人曰兒所持  
是也平生布衣糲飯澹然自居故能無求於世無怨  
於人有吳王簿者部運至留都密以八百金寄家大  
人一日暴殞家人失金所在家大人舉而歸之仍爲

護其喪還至通州通州人至今不知也年六十卽獨居一室絕葷酒不茹日惟禮佛誦經而已近者復以禮誦之半拵室宴坐期於冥契而未得也家有竹林俯青溪之勝舉頭則鍾山在焉大人時時杖屨出入婚嫁應酬一切不問人以爲皂帽布裘行窺園圃有管幼安之風故友楊道南目爲古逸民豈非謂其遺世自立而世之垢氛有不得而縉之邪蓋家大人之少也溷蹟于軒冕而不知其榮其壯也教子以讀書而不求其利其老也歸心禪誦而惟深信於因果信



心而游、盡意而已、當於無懷葛天世求之、非今人也、  
舉世識真者少、誰能辨別之、敢述大都以請於門下、  
倘得闡發道真、一攄幽隱、當傳示雲仍、永以爲好、非  
獨家大人得蒙度脫已也、予觀侯之言如此、不但謂  
予知侯、且謂予能知大人也、雖然、予縱知侯、其何能  
有加於侯之大人也哉、夫侯之所以事大人者、非直  
叔水之歡云也、吾謂大人之不朽者、盡在侯矣、予友  
侯也、且藉侯以不朽、而況大人、且大人不聞程太中  
乎、天下至今知有太中者、以程伯子也、大人深心余

佛亦知有淨飯王矣。天下至今知有淨飯王者，以黃面老子瞿曇也。由此觀之，大人之不朽者，可知矣。夫有子如侯而後，大人得以享其逸，則其謂之逸民也。固安。雖然，大人年已八十矣，行則超耄耄而進，期頤也。誦經則神勞，禮佛則形勞。今者獨居宴坐，又其安也。夫宴坐則逸，知逸則宜，知宜則順，是爲冥契。

○○釋子須知序

余自出滇，卽取道適楚，以楚之黃安有耿楚空周友山二君聰明好學，可藉以夾持也。未踰三年而楚空

先生沒友山亦宦遊中外去余悵然無以爲計乃令人護送家眷回藉散遣僮僕依親隻身走麻城芝佛院與周柳塘先生爲侶柳塘友山兄亦好學雖居縣城去芝佛院三十里不得頻頻接膝然守院僧無念者以好學故先期爲柳塘禮請在焉故爲遂依念僧以居日久唯僧安飽唯僧不覺遂二十年全忘其地之爲楚身之爲孤人之爲老鬚盡白而髮盡禿也余雖天性喜寂靜愛書史不樂與俗人接然非僧輩服事唯謹飲食以時若子孫之於父祖然亦未能遽爾

忘情一至於斯矣。余今年七十又五矣。旦暮且歿。尚  
置身冊籍之中。筆墨常潤硯。時時濕欲以何爲邪。因  
與衆僧留別。令其抄錄數種聖賢書。眞足令人啟發  
者。名曰釋子須知。蓋以報答大衆二十餘年慇懃。非  
敢曰爲僧說法也。

○○壽劉晉川六十序

歲丁酉春正月。劉晉川之壽六十。其弟若姪先二日  
爲壽於堂。呼余。余不知其爲壽筵也。蒙袂踏雪而至。  
晉川曰。此吾弟姪爲余慶六十者也。公可無一言乎。

余謂壽必有宴飲宴足矣。徒言奚爲？晉川曰：壽人以言古之道也。公其何辭？余謂有德乃有言，公爲少宰，所交皆海內豪英，豈無連篇巨椽爲公祝頌者而何待余言？且余又非能言者哉？晉川曰：子不嘗爲王氏祖母壽九十乎？九十固上壽六十亦中壽也。夫壽者受也，壽之上中下一視其所受。故觀其所受而上壽中壽下壽皆可不問而知之。夫鄰姻族黨之所稱壽者，不過以九十爲上壽六十爲中壽耳矣。此則鄰姻戚里子姓族屬諸人皆能爲公道之而何待余也。

耶。今夫執爵饌，食擎跪上，獻跪而陳果，趨而載羹爰  
日如年，惜陰若歲，願我雙親結髮齊眉，百年偕老，此  
則人子之所以壽其父母也。長枕大被，猶若共乳，易  
衣分痛，念昔同胞，怡怡如也。翁翁如也，鵲鴒急難，步  
卽相隨，茱萸徧插，離卽相思，是日也，念昔者之方孩  
感今日已成翁，雙親不見，見兄維親，怙恃何在，有弟  
怙予，此則兄弟之所以相爲壽也。出而迎賓，入而拜  
舞，羅八珍於堂前，陳百戲于階下，笙歌迭奏，簫鼓繼  
作，托則若予輩之所以壽其伯父與叔父也。此謂家

讌咸以上壽爲期卽過百歲未以爲足者也若夫親  
鄰族黨之壽則必有以矣思吾散九百之卿祿不須  
乞物而布惠頓令闔郡之咸貴不難施地爲學宮義  
田尚在麥丹非遠於是乎感德懷恩舉手加額遙祝  
則望門而拜稱觴則接踵而趨念桑梓之有人恨敬  
其之唯晚此則鄰里鄉族之所爲壽者又如此矣夫  
子壽如此兄弟之相爲壽如此姪輩壽如此以至姻  
親族黨其壽皆如此矣余若更以百歲爲公壽不旣  
贊乎夫子辱在友朋者也今公亦以余爲眞友朋也

予雖欲辭而友朋之義不得辭但恐言之而公不肯信耳雖然予試言之公試聽之以公聰明想亦未有不信者也夫堯舜與禹天下之上壽也而至今在太原狄梁公白樂天聞喜裴晉公汾陽文潞公古今之中壽也而至今在此雖未可同日語壽然皆公之鄉人皆與天地相終始雖中壽亦上壽也堯平陽舜蒲坂而大禹安邑與沁上壤接文潞公諸賢不以上壽遜讓三聖而謂公肯讓太原聞喜汾陽四賢者乎吾不信也夫此四賢亦猶人耳即可立躋上壽亦以所



受者宏也。上壽如海。百川日注而不盈。以有尾閭以洩之。已復散爲百川。故終日注。終日洩。而不溢。不竭也。此大受之量也。非與其能受。與其能洩也。若江若河。則異矣。上流若一月日霖雨不止。卽衝沙頽岸。壞屋廬。田土損。民不小矣。賴其終朝赴海。不暫停止。故他處無傷所傷者一二。而所利濟者千百。則歸海之功能洩之驗於斯尤著。吾故曰壽者受也。三聖如海。西賢如江河。其壽皆與天地長久。雖中壽亦上壽也。此之謂朋友之壽。其朋友者如此。公其以予爲真朋。

友乎若曰李卓吾雖不知其於白樂天諸賢何如也而能切切焉以是願余余決不敢以爲贅願書之以爲劉某上壽

○○○老人行叙

老人之遁跡於龍湖也亦多季矣舍而北遊得無非計乎其愈老而愈不憚勞也夫老人之本心其大較可知也大較予之初心不是欲人成佛便是欲人念佛耳而人多不信可如何或信矣而衆魔復害之使之卒不敢信可如何因而謗佛沸騰憂患叢生終

歲閉戶而終歲禦寇有由也。余雖不欲卒老于行。又可得耶。余是以足跡所至。仍復閉戶獨坐。不敢與世交接。既不與世接。則但有讀書耳。故或諷誦以適意。而意有所拂。則書之。或俯仰以致慨。而所慨勃勃。則書之。故至坪上。則有道古錄四十二章書。至雲中。則有孫子參同十三篇書。至西山極樂僧舍。則有淨土決三卷書。隨手輒書。隨書輒梓。不能禁也。又有坡公李譜并後錄三卷。陳正甫約以七八月。余到金陵來索。又有藏書世紀八卷。列傳六十卷。在塞上日。余又

再加修訂到極樂卽付羸弱侯校閱託爲叙引以傳  
矣。今幸偕弱侯聯舟南邁舟中無事又喜朋盍不復  
爲閉戶計矣。括囊底復得遺艸彙爲二冊而題曰老  
人行不亦宜歟。夫老人初心蓋欲與一世之人同成  
佛道同見佛國而已。著書立言非老人事也。而書日  
益多言日益富何哉。然而老人之初心至是亦徒然  
耳。則雖曰老人行而實則窮途哭也。雖欲不謂之徒  
然不可矣。雖然百世之下倘有見是書而出涕者堅  
其志無憂羣魔強其骨無懼患害終始不惑聖域立

躋如筆法師所謂將頭臨白刃一似斬春風吾夫子  
所謂有殺身以成仁者則所著之書猶能感通于百  
世之下未可知也則此老行也亦豈可遂謂之徒然  
也乎哉

○○○重刻五燈會元序

宋季靈隱太川禪師濟公以五燈浩博乃集學徒作  
會元以惠後人至元至正四年杭天竺薦壽禪寺住  
持希易釋廷俊因會稽沙門業海清公見五燈會元  
板毀罄衣鉢以倡施者于是康里公首捐俸以助而

板刻復成。故延俊序之。此第二梓也。至我明嘉靖平湖陸太宰五臺公。始諾徑山慈上人之請。爲疏勸化。復鑄五燈會元之板。則爲第三梓矣。唯茲板印行。而五燈罕覩。余念楊億通宗高禪。李遵勗時爲同參。氣蓋宇內。廣燈傳燈。旣經二老手訂筆叙。必有大可觀者。余雖老猶將翻而閱之。以快沒齒也。抑延俊又有言曰。至元間。于越雲壑瑞禪師曾作心燈錄。最爲詳盡。中間特援丘玄素所製塔銘。以龍潭信公出馬祖下。以致沮抑。不大傳世。識者惜焉。噫。是余

明嘉靖平湖陸太宰五臺公始諾徑山慈上人之請爲疏勸化復鑊五燈會元之板則爲第三梓矣唯茲板印行而五燈罕覩余念楊億通宗高禪李遵勗時爲同參氣蓋宇內廣燈傳燈旣經二老手訂筆叙必有大可觀者余雖老猶將翻而閱之以快沒齒也抑廷俊又有言曰至元間于越雲壑瑞禪師曾作心燈錄最爲詳盡中間特援丘玄素所製塔銘以龍潭信公出馬祖下以致沮抑不大傳世識者惜焉噫是余

又未曾見瑞公所作心燈錄矣

○○○壽王母田淑人九十序

卓吾居士曰楚之麻城有梅姓者實爲世家名族余過其家門不見有扁額當孔道不見有坊牌但見有石樓巍然出雲書曰百歲坊云其上爲二方共一方書曰曾大父某壽若干歲曾大母某氏壽若干歲其弟二方書曰大父某壽若干歲大母某氏壽至百歲以上梅氏同胞親昆弟六人長卽客生其四弟五弟六弟年少壯絕聰偉時時試爲文學特等其二弟三

弟皆一時同領鄉薦而客生又與其二弟并其妹婿  
一時同登進士一爲臺諫一爲給諫亦頗光榮矣而  
過門不見扁額過街不見牌坊倘不有百歲石樓橫  
截當路卽不知此中乃梅氏之居也豈客生之意專  
以百歲爲榮歟意富與貴亦人世常有而唯壽爲難  
歟故知洪範五福一曰壽非徒然也抑以子子孫孫  
所以貴且賢者皆其大母與其大父福壽之所遺以  
故欲表而揚之以見其所自歟然則客生之意遠矣  
此余旅寓龍湖之日所見百歲坊所聞梅氏母者如



此今萬曆二十五年丁酉，予復旅寓沁水之坪上，而獲見劉晉川之壻王洽者。王洽見余，每爲余道其祖母田淑人之壽，見今九十歲，其修齋誦經念佛作福，勤儉好施，聰明快便，猶五六十歲時也。夫王洽之父，卽太叅公王正吾也。其從祖父，卽冢宰王公家世如此。而王洽每以祖母壽考福德歷歷爲余詳言之，不已。豈亦有大同之意乎？今余將往大同矣，倘過陽城，入門而化飯，則必請見尔祖母于堂而親祝之，曰：作福須勤念佛尤當勤也。又祝曰：作福則生天，壽雖千

億尚有量也。念佛則皈依西方佛。而以蓮花爲父母。其壽不可量也。又祝而言曰。念經必誦阿彌陀經。誦觀音經。誦金剛經。今往見大同。必爲梅大同頌之矣。他日倘再至麻城。余必大張之曰。是百歲坊也。吾雖聞其壽未獲見其人。也是梅氏之大母也。雖壽至百歲以上。猶未爲無量也。吾今親見王氏祖母。吾又親祝之。吾實見無量壽佛來矣。

○○自刻說書序

李卓吾曰。予雖自是而惡自表暴。又不肯借人以爲

重。既惡表暴。則宜惡刻書。而卒自犯者。何則。以此書有關於聖學。有關於治平之大道。不敢以惡表暴。而遂已也。既自刻矣。自表暴矣。而終不肯借重於人。儻有罪我者。其又若之何。此又予自是之病。終不可得而破也。寧使天下以我爲惡。而終不肯借人之力。以爲重。雖然。倘有大賢君子。欲講修齊治平之學者。則予之說書。其可一日不呈於目乎。是爲自刻說書序。

○○選錄睽車志敘

余自在秣陵時。與焦羽侯同梓。感應篇後隱于龍湖。

精舍復輯因果錄。今弱侯罷講官。余又與之連舟南  
行。舟中閒適。弱侯示余郭伯象聯車志。余取其最徹  
切者。日間細書數紙。以與衆僧觀。省夜則令衆僧誦  
法華經。念往生神呪。并度脫水神水鬼。則晝夜皆明  
鬼事矣。方誦經畢。回向發願文。必叙所因。余因而直  
書曰。焦弱侯狀元。與余聯舟云云。弱侯曰。此二字可  
勿用也。余謂鬼神有尚賢者。不書可矣。倘不然。則狀  
元二字。亦可使致敬。何妨乎。弱侯曰。嚇鬼曰已可矣。  
余笑曰。調神之敬之。則可。調其可嚇。則不可。使公真

能嚇鬼。今亦不上此舟矣。因大笑遂書之以爲睽車志引。睽車志多。余所手錄者。不過十之一。不知者以爲好怪。其知者則以爲可與因果錄感應篇同觀。若能與感應篇同觀。則此睽車志。豈曰載鬼一車也乎哉。因太上之旨矣。

○○說弧集叙

睽車志志鬼也。疑其爲鬼。則以人與鬼異。遂張弧而欲射之。說弧集集鬼也。集諸鬼說。直以人與鬼同。遂說弧而不之射焉。夫人直至于所不見。人幽不見鬼。

則幽明人鬼一以貫之矣。何生死之可了。又何涅槃之可期。彼爲無鬼之說者。又安知其非通于性命之奧者乎。

○南詢錄叙

谿渠上人姓鄧。蜀之內江人也。蜀人多爲我言上人初爲諸生。卽以諸生鳴。其自抱負也已甚。平生未嘗輕以實學推許前輩。故亦不肯謬以其身從諸生後。強談學以爲名高。雖蜀有太洲先生者。文章氣節偉然可觀。上人亦未以實學許之。以故師事趙老者。在

朝盈朝居鄉滿鄉上人竟不屑往焉此其負也其個  
強也如此其大可笑者趙老以內翰而爲諸生談聖  
學于東壁上人以諸生而爲諸生講舉業于西序彼  
此一聞耳朝夕聲相聞初不待傾耳而後聽也雖趙  
老與其徒亦咸謂鄧豁已矣無所復望之矣然鄧豁  
卒以心師趙老而稟學焉吾以是觀之上人雖欲不  
聞道不可得也雖欲不出家不遠遊不棄功名妻子  
以求善友抑又安可得邪吾謂上人之終必得道也  
無惑也今南詢錄具在學者試取而讀焉觀其間關

萬里辛苦跋涉以求必得介如石硬如鐵三十年于  
茲矣雖孔之發憤忘食不知老之將至何以加焉予  
是愧焉以彼其志萬分一我無有也故復牒而敘之  
以自警且以警諸其學者中間所云茅舍獨坐鷄犬  
明心雖曰水到渠成而其端實自趙老發之吾固哀  
其志而決其有成又以見趙老之真能得士也

○序篤義

以上皆篤義者義固生於心也張堪有知己之言文  
季卽以信于心唯王修能昌難而來言未卒而修至



義固生於心也。豈好義而爲者之所能至乎？是故視之如草芥，則報之如寇讐，不可責之，謂不義視之如手足，則報之如腹心，亦不可稱之，謂好義。是故豫讓決死于襄子，而兩矢節于范氏與中行，相知與不相知，其心固以異也。故曰：士爲知己者死，而況乎以國士遇我也？士之忘身以殉義者，其心固如此。又曰：吾可以義求，不可以威劫。可義求，是故澹臺子羽奔千金之璧，不可劫以威，是故鮫可斬，璧終不可強而求。士之輕財而重義者，其心固如此。

○○序言善篇

劉晉川曰言善篇者何卓吾老子取其將死而言善也夫苟其言之善矣奚待將死將自幼至壯自壯至老未有一言之不善者若待將死而後善則恐雖死亦未必善也吾謂卓吾子欲人之聽之也故獨以言善名其篇而豈真謂將死而後善哉夫言者身之符心之聲也其言之善則必其身之善其身之善則必其心之善卓吾子之心之身之善余旣久相與處而知之審矣奚待于言而又奚待

于將死之言乎但時無

先師孔子設教于上以爲之表章故使卓吾子泯泯  
悶悶遂嘔棄於人世不然卓吾子者固爲人謀而  
必忠與朋友交而必信傳而必習戰戰兢兢臨深  
履薄恒恐一毫之失墜所謂其君用之則安富尊  
榮其子弟從之則孝弟忠信卓吾子之身之心皆  
兼而有之矣奚獨言善又奚獨將死也是書凡六  
百餘篇皆古聖要語卓吾彙而輯之欲以開來學  
而繼往聖余尚未見見其小引三首與言善篇目

而已客冬卓吾子大困于楚適有馬侍御者自潞  
河肩雪入楚往攜之以出同居通州朝夕叅請身  
心之僭善予愧羈留淮濟不能如侍御捷之速也  
卓吾子曰公勿言公勿言此正予他山之石此正  
予將死而大獲進德修業之益也嗚呼此非卓吾  
子之言之善乎天下之善言更復有過于是者乎  
向非身心之善真有同於曾參真加于人數等雖  
欲強勉以爲此言不得矣遂因其語而書之以爲  
言善篇小引

○○道敎鈔小引

凡爲釋子但知佛教而不知道敎夫道家以老君爲  
祖孔夫子所嘗問禮者觀其告吾夫子數語千萬世  
學者可以一時而不佩服于身一息而不銘刻于心  
邪若一息不銘刻則驕氣作態色著滯志生禍至無  
日矣余老且死猶時時犯此症候幾爲人所魚肉況  
如楊生定見者筋骨雖勝余識見尤後于余而可不  
切切焉佩以終身與老子道德經雖日置案頭行則  
攜持入手夾以便諷誦若關尹子之文始真經與譚

子化書皆安隨身者何曾一毫與釋迦差異也故獨  
編錄之以示釋子之有志向而其欲以示楊定見也  
尤切

○○聖教小引

余自幼讀聖教不知聖教尊孔子不知孔夫子何自  
可尊所謂矮子觀場隨人說研和聲而已是余五十  
以前真一大也因前犬吠形亦隨而吠之若問以吠  
聲之故正好啞然自笑也已五十以後大衰欲死因  
得友朋勸誨翻閱貝經幸于生死之原窺見班點乃

復研窮學庸要旨知其宗貫集爲道古一錄于是遂  
從治易者讀易三年竭晝夜力復有六十四卦易因  
鏤刻行世嗚呼余今日知吾夫子矣不吠聲矣向作  
矮子至老遂爲長人矣雖余志氣可取然師友之功  
安可誣邪旣自謂知聖故亦欲與釋子輩共之蓋推  
向者友朋之心以及釋子使知其萬古一道無二無  
別真有如我

太祖高皇帝所刊示者已詳載于三教品刻中矣夫  
釋子旣不可不知況楊生定見專心致志以學夫子

邪幸相與勉之果有定見則察前倚衡皆見夫子  
忠信篤敬行乎蠻貊決矣而又何患于楚乎

○○○書蘇文忠公外紀後

卓吾曰蘇長公以文字故獲罪當時亦以文字故取  
信於朋友流聲於後世若黃秦晁張皆是也畧考仁  
英神哲之朝其中心悅而誠服公者蓋不止此蓋已  
盡一世之傑矣黃秦晁張特其最著者也然則爲黃  
秦晁張者不亦幸乎雖其品格文章足以成立不待  
長公而後著然亦未必灼然光顯以至于斯也余老



且拙自度無以表見于世勢必有長公者然後可托以不朽。隸弱侯今之長公也。天下士願藉弱侯以爲重久矣。嘗一日顧謂弱侯曰。公能容我作一老門生乎。弱侯笑曰。我願以公爲老先生也。余謂余實老矣。公年又少。余十五歲則余實先公而生。其爲老先生無疑。但有其實無其名。我不願也。唯願以老先生之實托老門生之名。而恒念無四子之才之學。卽欲冒托門下以成其名。又安可得邪。時有從旁贊曰。黃山谷有云。管城子無食肉相。孔方兄有絕交書。今公管

城如之孔方如之正今之山谷老人矣余喜而揖曰  
有是哉幸然爲我授記也遂記其語于此

○書應方卷後

此焦弱侯爲靈公書也予館于靈公精舍先是弱侯  
數與靈公道予故予遂館于靈公靈公今得弱侯數  
語靈公不朽矣先已丑爲羅念菴先生先生溪于道  
此萬曆己丑爲焦弱侯先生先生亦溪于道人品畧  
相似而契悟勝之才學勝之筆畫不如念菴先生婉  
媚而古拙迥別六十季間出此兩人又適當己丑之

期靈公其善寶藏之

○○書小修手卷後

歲辛丑余在潞河馬誠所。又遇袁小修三弟。雖不  
獲見太史家兄。得見小脩足矣。況復見此卷乎。小修  
勸我勿喫葷。余問之曰。爾欲我不用葷。何故。曰。恐閻  
王怪怒。別有差委。不得徑生淨土耳。余謂閻王喫葷  
者。安敢問李卓吾邪。我但禁殺。不禁嘴。亦足以免矣。  
孟子不云。七十非肉不飽。我老。又信儒教。復留鬚。是  
宜吃小脩。曰。聖人爲祭祀故。遠庖厨。亦是禁吃葷者。

其言非肉不飽特爲世間爲爾老耳豈爲李卓老設  
此言乎願勿作此搪塞也余謂我一生病潔凡世間  
酒色財半點污染我不得今七十有五素行質鬼神  
鬼神決不以此共見小醜難問李老也小修曰世間  
有志人少好學人益少今幸我

明世界

大明升天人人皆具隻眼直思出世爲學究竟大事  
先生向懷止山林棄絕人世任在喫葷猶可今日已  
埋名不得盡知有卓吾老子棄家學道作出世人豪

矣。十目共視，十手共指，有一毫不慎，卽便退心。有志者，以爲大恨。故我願先生不茹葷，以興起此一時聰明。有志向之者，忍一時之口，嘴而可以度一世。人士先生又何憚不爲予翻然喜曰：若說他等皆真實向道，我願斷一指，誓不喫葷。

○西征奏議後語

劉子明宦楚時，時過余，一日見邸報，東西二邊並來報警，余謂子明：二俱報警，孰爲稍急？子明曰：東事似急，蓋得聞向者倭奴海上橫行之毒也。余謂東事尚

緩西正急耳

朝廷設以公任西事當若何子明徐

徐言曰招而撫之是已余時嘿然子明曰於子若何  
余即曰勦除之無俾遺種也子明時亦嘿然遂散去  
蓋天下之平久矣今者非但所用非所養所養非所  
用已也自嘉隆以來余日擊都之變矣繼又聞有  
閩海之變繼又聞有錢塘兵民之變以及鄖陽之變  
矣當局者艸艸了事招而撫之非謂招撫之外無別  
智畧可以制彼也彼桀驁者遂欲以招撫任我謂我  
於招撫之外的無別智畧可爲彼制不亦謬乎今者

李氏續焚書

卷二

廿二

若循故習不大誅殺竊恐效尤者衆聞風興起非但西夏足憂也且西夏密邇戎馬至爲關中要區第未審此意當待何日乃可向人言之耳已而西事日熾朝廷日徵四方之兵樞密大臣選鋒遣將似若無足以當其選者于時梅侍御客生獨薦李成梁又不合當事者意復成道傍之築矣事在煥眉可堪議論之多邪嗣後警報愈急閱時愈久客生不得已乃復疏而。上之此賊當蚤撲滅失今不圖遲至秋孰必滋蔓茲蔓則愈費力矣若徒以不信李成梁故臣請監

其軍以往於是。上遂許之。余時聞此喜見得馳走告子明曰。西方無事矣。客生以侍御監軍往矣。子明時又嘿然。蓋子明雖知余言之可信。實未審客生之爲何如也。意者彼我相期。或類今世人士之互爲標榜者耳。吁。此何事也。而可以牝牡索駿坐斷成事于數千里之外。那時有如子明輩者。頻頻相見。亦皆以西事爲憂。余皆告之曰。軍中既有梅監軍在。公等皆可不必要矣。諸公亦又嘿然。蓋諸公非但不知客生。且不知余。而又能信余之言也。未幾而西夏之報至。



矣。事果大定，獻俘于廣闕下，報捷于京師，論功稱賞，亦可謂周遍咸矣。褒崇之典，封爵之勝，垂綸廣蔭，同載並舉，而客生間朝半歲，曾不聞有恩陞之及，猶殊一待御，何也？余疑訝之，而未得其故。後于他所獲讀，所爲西征奏議者，乃不覺拊几歎曰：余初妄意謂客生西事，我能爲之，縱功成而不自居，我亦能之，不知其犯衆忌，處嫌疑，日夕孤危，置身於城下，以與將佐等伍，而卒能成奇功者也。余是始愧恨，以謂干不如客生，萬不如客生，再不敢復言世事矣。因密語相

信者曰西夏之事不難于成功而難于以監軍成功何也監軍者無權者也自古未有不專殺生之權而可以與人鬪者也又不難於以監軍成功而難乎任訕謗于圖城之日嘿無言於獻捷之後也嗚呼客生既能爲人之所不能爲矣而世人猶然不知也方客生之蒙犯矢石於堅城之下也兵糧不給虜騎來奔設奇運謀賊反以城自獻矣而世人猶然不見也況乎監軍之命初下西征之檄始飛而我乃嘖嘖然斷成事于數千里之外而欲其必信我不亦惑歟雖然

天下之事固有在朝不知而天下之人能知之亦有  
一時之天下不能知至後世乃有知者但得西方無  
事國家晏然則男兒志願畢矣知與不知何預吾事  
余是以密書此語于西征奏議之後以俟後世之欲  
任事者知所取則焉

說彙

○○汝師子友名字說

莊純夫長兒名祖耳字汝師中子名惠施字子友果  
是親兄弟不必同名字也連登上第而外人不知則

不生疾妬其爲賢聖而世俗不知則不生論議不然  
不曰兄爲程伯子優其弟程正叔也則曰陳元方難  
兄而季方難弟也又曰季方難爲弟而元方難爲兄  
也種種論議皆從同名字來何必同名字果其才同  
則八元八愷不同名八龍八士不同名何必同名字  
也學同業術同方友愛同氣同以下人爲心同以上  
人爲志此空同者却不知同顧唯知有名字之同如  
世俗兄弟同名同字同相爭鬪同告狀唯恐其不得  
不同焉用乎名字之同也是爲不必名同與字說

○○窮途說

卓吾和尚曰。天下唯知己最難。吾出家以來。本欲遍遊天下。以求勝我之友。勝我方成我。此一喜也。勝我者必能知我。此二喜也。有此二喜。故不憚棄家入楚。入楚得楚倥。力楚倥亦甚知我。不幸楚倥死。乃去新邑。入舊縣。入舊縣又得周友山。力友山又是真實勝我者。故友山亦甚知我。夫勝我者必知我。知我者必定勝我。兼此二喜。予安得舍此而他去也。邪。況季紀又老。脚力不前路費難辦乎。是以就龍湖而棲止。

焉一以近友山一以終老朽如此而已矣。住龍湖爲  
龍湖長老者。則深有僧。近龍湖居。而時占上龍湖作  
方外伴侶者。則楊定見秀才。予賴二人。又得以不寂  
寞。雖不可以稱相知。然不可以不稱相愛矣。老歿龍  
湖。又何疑焉。兩年以來。深有稍覺滿足。近又以他事  
怪其徒常聞。逃去別住。予乃作書寄之。大畧具在三  
嘆餘音稿中矣。楊定見勸我言曰。和尚且坐一坐。蓋  
念我年老費力。又以深有自是。決不聽我故也。復引  
論語不可則止之語。以重勸予。予謂不可則止之語。

在後而忠告善道之語在先。今不開忠告善道而先以不可則止自止何邪。況此語本爲疎交泛交而發。若深有與我三人者。聯臂同席十餘年矣。學同術業同方。憂樂同事。徒弟徒孫三四十人。視我如大父母。真骨血一般。建塔蓋殿。卽已事不若是勤也。其平日情義如此。今縱忠告而不聽。尤當繼之以泣。況未嘗一言而遂以爲不可乎。予謂連爾亦當作一懇切書與之。諸徒弟徒孫輩亦當連名作一書與之。彼見衆人俱以爲言。卽有內省之念矣。況深有原是一老實

之人只爲無甚見識。又做人師父。被人承奉慣了。便覺常聞非耳。若人人盡如常聞之言。彼必定知悔也。且深。有未打常聞之先。本無失德也。雖不言可也。今旣亂以皮鞭打常聞矣。猶然不得快活。復怨怒上山。造言捏詞。以爲常聞趕之。日夜使其徒衆搬運糧食。上六七十里之高山。不管夏至之時。人不堪勞。則爲惡極而罪大也。是以不容坐視而不佗書以告之也。若如子所言。是何心行乎。定見尚不省。乃謂和尚尚不聽我等之言。而欲深有聽和尚之言。必不得也。況



入都說是和尚趕他上山去邪。予謂既說是我趕他  
去則爾此書尤不容于不作也。不但救深有亦且救  
我使我得免熱趕之罪。是一舉而拯我二人尤不可  
以不作書矣。卽他不聽而彼此之心已盡。我熱趕之  
罪得免不亦美乎。縱然是我趕他上山去。我今又去  
接他下山來。乃所宜也。乃是真大人之所爲也。乃反  
以我爲不必何邪。

○○○法華方便品說

此增上慢者不知佛之方便而遂信以爲佛之真實。

一聞妙法能無畏乎此世尊所以三止舍利弗之請而不告五千比丘所以遂退而不返也夫此妙法如優曇鉢華時一見耳三乘聖人猶不可以遽語而況于增上慢之人哉舍利弗雖曰聲聞之選然植根深矣沐浴膏澤也久矣其爲慶快當有不言而喻者惜乎不一記述當時所以深信之妙法也所有記者安知卓吾子讀之不望涯而亦返乎然苟有妙法可記卓吾老子雖欲不返亦不可得也是經二十八品品皆說妙法蓮華至求其所謂妙法蓮華者竟不可

得嗚呼此所以爲妙法蓮華也與

○金剛經說

金剛經者大般若經之一也吾聞經云金最剛能摧  
伏魔軍普濟羣品故謂之金剛云人性堅利物不能  
壞亦復如是故忍和尚爲能大師說此經典至應無  
所住而生其心豁然大悟便爾見性成佛一何偉也  
說者謂朱夫子曾闢此語以爲得罪于吾聖門不知  
朱子蓋有爲也蓋見世人執相求佛不知卽心是佛  
卒以毀形易服遺弃君親之恩而自畔於教故發此

語○初○非○謂○全○忠○與○孝○能○盡○道○於○君○臣○父○子○之○間○者○設○  
也○使○其○人○意○誠○心○正○而○倫○物○無○虧○則○雖○日○誦○金○剛○亦○  
何○得○罪○之○有○今○觀○朱○夫○子○平○生○博○極○羣○書○雖○百○家○九○  
流○靡○不○淹○貫○觀○其○註○叅○同○契○可○見○矣○然○則○學○者○但○患○  
不○能○正○心○耳○夫○誠○意○之○實○在○毋○自○欺○心○之○不○正○始○于○  
有○所○有○所○則○有○住○有○住○則○不○得○其○正○而○心○始○不○得○自○  
在○矣○故○曰○心○不○在○焉○視○不○見○而○聽○不○聞○而○生○意○滅○矣○  
惟○無○所○住○則○虛○虛○則○廓○然○大○公○是○無○物○也○既○無○物○何○  
壞○之○有○惟○無○所○住○則○靈○靈○則○物○來○順○應○是○無○息○也○既○

無息何滅之有此至誠無息之理金剛不壞之性各在當人之身者如此而愚者不信智者穿鑿宋人握苗告子助長無任真心妄立能所生生之妙幾無息滅是自欺也故經中復致意云應生無所任心是心也而可與不忠不孝削髮異服者商量面目哉

○五宗說

青原有曹洞雲門法眼三宗南嶽有潯仰臨濟二宗所謂五家宗派是也是五宗也始于六祖而盛于馬祖蓋自馬祖極盛而分派始益遠耳故江西馬大師

亦以祖稱以其爲五家之宗祖也。雖藥山諸聖咸嗣石頭之旨而機緣契悟實馬大師發之。馬祖之教不亦弘與唯其有五宗。是以其傳有五燈。因其支分派別源流不絕則名之曰宗。因其重明繼燄明明無盡則稱之曰燈。其實一也。此五宗之所由以大而五燈之所由以傳以續也。在我後人寧可不知其所自邪。若永嘉真覺大師與南陽忠國師雖未暇叙其後嗣然其見諦穩實不謬爲六祖之宗明甚乃傳燈者卽以已意抑而載之旁門何其謬之甚與余故首列而

并出之

○○隱者說

時隱者時當隱而隱所謂邦無道則隱是也此其人固有保身之哲矣然而稍有志者亦能之未足爲難也若夫身隱者以隱爲事不論時世是也此其人蓋若有數等焉有志在長林豐草惡露耽寂而隱者有嬾散不耐煩不能事生產作業而其勢不得不隱者以此而隱又何取于隱也等而上之不有志在神仙願弄人世如陶弘景輩者乎身遊物外心切救民如

魯連子者乎志趣超絕不屈一人之下如莊周嚴光  
陶潛邵雍陳搏數公者乎蓋身雖隱而心實未嘗隱  
也此其隱蓋高矣然猶未大也必如阮嗣宗等始爲  
身心俱隱無得而稱焉嗟夫大隱居朝市東方生其  
人也彼阮公雖大猶有迹名之累尚未離乎隱之迹  
也吾謂阮公雖欲爲東方馮道之事而不能若馮公  
則真無所不可者矣

○三教歸儒說

儒道釋之學一也以其初皆期於聞道也必聞道然



後可以死。故曰朝聞道夕死可矣。非聞道則未可以死。故又曰吾以女爲死矣。唯志在聞道。故其視富貴若浮雲。棄天下如敝屣。然也。然曰浮雲直輕之耳。曰敝屣直賤之耳。未以爲害也。若夫道人則視富貴如糞穢。視有天下若枷鎖。唯恐其去之不速矣。然糞穢臭也。枷鎖累也。猶未甚害也。乃釋子則又甚矣。彼其視富貴若虎豹之在陷阱。魚鳥之入網羅。活人之赴湯火。然求死不得。求生不得。一如是甚也。此儒道釋之所以異也。然其期于聞道以出世一也。蓋必出世

然後可以免富貴之苦也。堯之讓舜也，唯恐舜之復洗耳也。苟得攝位，卽爲幸事，蓋推而遠之，唯恐其不可得也。非以舜之治天下有過於堯而故讓之位以爲生民計也。此其至著者也。孔之疏食，顏之陋巷，非堯心與？自顏氏沒，微言絕，聖學亾，則儒不傳矣。故曰天祿予何也？以諸子雖學，未嘗以聞道爲心也。則亦不免仕大夫之家爲富貴所移爾矣。況繼此而爲漢儒之附會，宋儒之穿鑿乎？又況繼此而以宋儒爲標的，穿鑿爲指歸乎？人益鄙而風益下矣。無怪其流弊

至于今日陽爲道學陰爲富貴被服儒雅行若狗彘然也夫世之不講道學而致榮華富貴者不少也何必講道學而後爲富貴之資也此無他不待講道學而自富貴者其人蓋有學有才有爲有守雖欲不與之富貴不可得也夫唯無才無學若不以講聖人道學之名要之則終身貧且賤焉耻矣此所以必講道學以爲取富貴之資也然則今之無才無學無爲無識而欲致大富貴者斷斷乎不可以不講道學矣今之欲真實講道學以求儒道釋出世之旨免富貴之

苦者斷斷乎不可以不剃頭做和尚矣

### 論榮

#### ○○論交難

以上皆易離之交，蓋交難則離亦難。交易則離亦易。何也？以天下盡市道之交也。夫既爲市矣，而曷可以交？目之曷可以易？離病之則其交也不過交易之交耳。交通之交耳，是故以利交易者利盡則疎，以勢交通者勢去則反，朝磨肩而暮掉臂固矣。夫唯君子超然勢利之外，以求同志之勸而後交，始難耳。況學聖

人之學而深樂夫得朋之益者則其可交必如孔子。而後可使七十子之服從也何也七十子所欲之物唯孔子有之他人無有也孔子所欲之物唯七十子欲之他人不欲也如此乎其欲之難也是以終七十子之身不知所掉臂也故吾謂孔子固難遇而七十子尤難遇也吾又以是觀之以身爲市者自當有爲市之貨固不得以聖人而爲市井病身爲聖人者自當有聖人之貨亦不得以聖人而兼市井吾獨怪夫今之學者以聖人而居市井之貨也陽爲聖人則

炎漢宗室既以爲篡位而誅之陰爲市井則暴徇少年又以爲穿窬而執之非但滅族于聖門又且囚首于井里比之市交者又萬萬不能及矣吾不知其于世當名何等也

○強臣論

臣之強強于主之庸耳苟不强則不免爲舐痔之臣所讒而爲弱人所食噉矣死即死而噉即噉可也目又安得瞑也是以不得已于強也顏魯公唯弗強也卒以八十之年使死于讒李懷光唯不得已于強也

卒以入赴王室之難而遂反于讒皆千載令人痛恨者甚矣主之庸可畏也然則所謂強臣者正英王之所爲能臣唯恐其禮待之不優者也喬玄之言曰君治世之能臣亂世之奸賊吾以是觀之使老瞞不遭漢獻豈少一匡之勲歟設遇龍顏則三傑矣奈之何貳痔固寵者專用一切附己之人口事讒毀驅天下之能臣而盡入于奸賊也敦之咎王導曰不聽吾言幾致滅族夫晉元帝其初蓋奴虜不盡之琅邪耳非王導無以有江左至明也一有江左卽以力協爲腹

心而欲滅王氏何邪晉孝武亦幼冲之主也非謝安  
出東山則桓溫之逆謀其遂必矣後乃代溫位而居  
其任故能却百萬之師殺符融而降符朗也既幸無  
事而道子之讒遂行又何邪安唯恐不免于讒賊之  
口也盡室以行步丘是避造汎海之裝於廣陵之下  
欲由此還東矣乃未就而疾作傷哉于是桓玄篡位  
劉裕代晉强者終能自強而不敢强者終岌岌以歿  
也夫天下強國之臣能強人之國而終身不謀自強  
而甘岌岌以歿者固少也是以英君多能臣而庸君



多強臣也。故言強臣而必先之以庸君也。

○○○譎奸論

譎莫譎于魏武。奸莫奸于司馬宣王。自今觀之。魏武狡詐百出。雖其所心腹之人。不吝假睡以要除之。而司馬宣王竟奪其領下之珠。不必遭其睡也。故曹公之好殺也。已極。而魏之子孫。卽反噬于司馬。司馬之噬曹也。亦可謂無遺畱矣。而司馬氏之子孫。又卽啖食于犬羊之羣。青衣行酒。徒跣執蓋。身爲天子反奴。虜于鮮卑。戮辱于厥廷之下也。一何慘毒酷烈。令人

反袂掩面含羞而不忍見之歟然則天之報施善人  
竟何如哉吾是以知天之報施果不爽也吾又以知  
譎之無益奸之受禍也故作譎奸論以垂鑒焉

李氏續焚書卷之二終